

開放文學 – 歷代筆記 – 夷堅甲志 卷第一

孫九鼎 孫九鼎·字國鎮·忻州人·政和癸巳居太學·七夕日·出訪鄉人段濬儀於竹柵巷·沿沿北岸而行·忽有金紫人騎從甚都·呼之於稠人中·遽下馬曰·國鎮久別安樂·細視之·乃姊夫張姚也·指街北一酒肆·曰·可見邀於此少從容·孫曰·公富人也·豈可令窮措大買酒·曰·我錢不中使·遂坐肆中·飲自如·少頃·孫方悟其死·問之曰·公死已久矣·何為在此·我見之·得無不利乎·曰·不然·君福甚壯·乃說死時及孫送葬之事·無不知者·且曰·去年中秋我過家·令姊輩飲酒自若·並不相顧·我憤恨傾酒壺擊小女以出·孫曰·公今在何地·曰·見為皇城司注祿判官·孫喜即詣前程·曰·未也·此事每十年一下·尚未見姓名·多在三十歲以後·官職亦不卑下·孫曰·公平生酒色甚多·犯婦人者無月無之·焉得至此·曰·此吾之跡也·凡事當察其心·苟心不昧·亦何所不可·語未畢·有從者入報曰·交直矣·張乃起偕行·指行人曰·此我輩也·第世人不知之耳·至麗春門下與孫別·曰·公自此歸·切不得回顧·顧即死矣·公今已為陰氣所侵·來日當暴下·宜毋吃他藥·服平胃散足矣·既別·孫始懼甚·到竹柵巷見段君·段訝其面色不佳·沃之以酒·至暮歸學·明日大瀉三十餘行·服平胃散而愈·孫後連蹇無成·在金國十餘年·始狀元及第·為秘書少監·舊與家君同為通類齋生·至北方·屢相見·自說茲事·

柳將軍

蔣靜叔明·宜興人·為饒州安仁令·邑多淫祠·悉命毀撤·投諸江·且禁民庶祭享·凡屏三百區·唯柳將軍廟最靈·未欲輒廢·故隱然得存·廟庭有杉一株·柯乾極大·蔽陰甚廣·蔣意將伐之·日晝臥琴堂中·夢異人被甲乘馬·叩階而下·長揖言曰·吾姓木卯氏·居此方久矣·幸司成賜庇·不敢忘德·後十五年當復來臨·覺而知其為神·但不曉司成為何官·頗加歎訝·因置木不伐·仍繕修其堂宇·逮秩滿·詣廟告別·留詩壁間·曰·夢事雖非實·將軍默有靈·舊祠從此煥·古檜蔚然青·甲馬霄中見·琴堂臥正冥·留詩非志怪·三五扣神局·今刻石尚存·後十五年·乃自中書舍人出鎮壽春江寧·鈐轄江東安仁·實隸封部·人為大司成·至顯謨閣直學士而卒·

寶樓閣咒

袁可久·嘗教其弟昶·以寶樓閣咒·昶不甚深信·然旦起必誦三五十遍·初未知其功效也·紹興三年夏·肄業府學·方大軍之後·城邑荒殘·直齋卒汪成·每番宿室中·必夢魘·達旦方已·無一夕安寢·成殊以為苦·或詢其所見·雲·被人掙發欲加捶·故呼叫拒之·昶令徙於己房·猶不止·同捨生惡其妨睡·共議遣逐·昶試書咒語貼于柱·此夜晏然·由是一齋妖崇絕跡·其咒語即所謂唵摩尼達哩吽撥吒八字·但世俗所傳訛謬·寫皆從口·而亦不得其音·要當取大藏中善本元初譯師言為證·自有大功·昶因悔昔慢·始篤奉之·秘其事·三事皆孫九鼎言·孫亦有書記此事甚多·皆近年事·

三河村人

張維·字正倫·燕山三河人·家君初出使至太原·維以陽曲主簿館伴·嘗言宣和乙巳歲·同邑有村民·頗知書·以耕桑為業·年六十餘·一夕驚魘而覺·戰慄不自持·謂其妻曰·吾命止此矣·妻驚詰其故·曰·適夢行田間·見道上有七胡騎·內一白衣人乘白馬·怒色謂我曰·汝前身任唐為蔡州卒·吳元濟叛·我以王民治·為汝所殺·我銜恨久矣·今方得見·雖累世猶當以命償我·乃引弓射中吾心·因顛仆而寤·吾必不免·明日當遠竄以避此患·妻雲·夜夢何足信·汝妄思所致耳·老父益恐·未旦而起·其家甚貧·止令小孫攜被·欲往六十里外一親知家避之·行草徑三十餘里·方出官道·又二里許·遇數人·與同行·忽有騎馳至·連叱眾令住·行者皆止·老父回視·正見七騎·內一白衣人騎白馬·宛如夢中所睹·因大駭·絕道亟走·騎厲聲呵止之·不聽·白衣大怒曰·此口交加人·遂鞭馬逐之·至其前·引弓射中心·應弦而斃·七人者·皆女真也·

鐵塔神

蔚州城內浮圖中有鐵塔神·素著靈驗·郡人事之甚謹·契丹將亡·州民或見其神奔走於城外·亟詣寺視之·神像流汗被體·雖頗驚異·然莫測其故·至夜神見夢於寺主講師·曰·吾奉天符·令拘刷城中合死人·連日奔馳·始克就緒·來日午時·女真兵至破城·城中當死者·一千三百有畸·而本寺僧四十餘·和尚亦在籍中·吾久處茲地·平日仰師戒德·輒為以它名易之·詰旦從此而逝·庶萬一可脫·講師既寤·以語寺眾·皆笑其妄·遂獨挈囊登寺後山顛避之·行約五里·忽憶所遺白金盃·復下至寺·適有修供者·眾競挽留之曰·和尚聰明如此·顧乃信夢·今檀越在此·正欲和尚升堂演法·無故捨去·則此寺不可為矣·況邊上不聞有警·勉徇眾意·齋罷而行·亦何晚耶·僧不得已·遂升堂講畢·各就食·方半·有報女真自草地至·即圍城·城素無備·不可守·頃刻而陷·僧蒼皇失措·不暇走·兵已大掠城中·人與寺僧死者·如神告之數·講師亦不免·

觀音偈

張孝純有孫·五歲不能行·或告之曰·頃准甸間一農夫·病腿足甚久·但日持觀世音名號不輟·遂感觀音示現·因留四句偈曰·大智發於心·於心無所尋·成就一切義·無古亦無今·農夫誦偈滿百日·故病頓愈·於是孝純遂教其孫及乳母齊潔持誦·不兩月·孫步武如常兒·後患腿足者誦之皆驗·又汀州白衣定光行化偈亦云·大智發於心·於心何處尋·成就一切義·無古亦無今·凡人來問者·輒書與之·皆於後書贈以之中四字·無有不如意·了不可曉·

劉廂使妻

金國興中·府有劉廂使者·漢兒也·與妻年俱四十餘·男女二人·奴婢數輩·一日盡散其奴婢從良·竭家貲建孤老院·緣事未就·其妻施左目·以鐵杓剗出·去面二三寸許·方舉刀斷其筋·若有物翕然收睛入·其目儼然·如是者三·流血被體·眾人力勸而止·明日舉杓問·目已失所在·不克剗·又明日復如故·精明異常·眾皆駭而憐之·爭施金帛院宇遂成·時金國皇統元年·即紹興十年庚申也·

天台取經

紹興丁巳歲·偽齊濟州通判黃睦·死三日復甦·言有數人追之·往一公庭·見服緋綠人坐雲·差汝押僧五百人至五台·吾辭以家貧多幼累·不可行·左右吏前曰·可差李主簿代之·兼它非晚自有差使·復遣元追人送歸·故得活·後兩日·本州山口縣報帥司差李主簿赴州點視錢糧·舍縣驛中·一夕落枕暴亡·睦心知其代已死·為盡送終之禮·居一歲·忽沐浴易衣·告妻子曰·今當別汝·緣官中差我往天台取經·我平生得力者·緣看了華嚴經一遍·語迄·瞑目而逝·

冰龜

戊午夏五月·汴都太康縣·一夕大雷雨·下冰龜互數十里·龜大小不等·首足卦文皆具·

阿保機射龍

阿保機嘗居西樓·夜宿嚮帳中·晨起見黑龍長千餘丈·蜿蜒其上·引弓射之·即騰空夭矯而逝·墜於黃龍府之西·相去已千五百里·才長數尺·其骸今見置金國內庫·蕃相陳王悟室長子源嘗見之·尾鬣支體·皆具雙角·已為人截去·雲與吾家所藏董羽畫出水龍絕相似·謂其背上鬣不作魚鬣也·

冷山龍

冷山去燕山幾三千里·去金國所都五百里·皆不毛之地·紹興乙卯歲·有二龍不辨名色·身高丈餘·相去數步而死·冷氣腥穢襲人·不可近·一已無角·如被截去·一額有竅·大如當三錢·類斧鑿痕·陳王悟室欲遣人截其角·或以為不祥·乃止·先君所居·亦曰冷山·又去此四百里·

熙州龍

戊午夏·熙州野外灤水·有龍見三日·初於水面見蒼龍一條·良久即沒·次日見金龍以爪托一嬰兒·兒雖為龍所戲弄·略無懼色·三日金龍如故·見一帝者乘白馬·紅衫玉帶·如少年中官狀·馬前有六蟾蜍·凡三時方沒·郡人競往觀之·相去甚近·而無風濤之害·熙州嘗以圖示劉齊·劉不悅·趙伯璘曾見之·

酒香龜

徽廟有飲酒玉駱·大四寸·計貯酒可容數升·香龜小如拳·類紫石而瑩·每焚香以龜口承之·煙盡入其中·二器固以黃蠟·

遇遊幸必懷以往·去室蠟·即出酒·龜吐香·禁中舊無之·或傳林靈素所獻也·

偽齊咎證

偽齊受冊之初·告天祝版·吏誤書年號為靖康·又純用趙野家廟器·識者以為不祥·卒為金人所廢·又作紙交子·自一貫至百貫·右語雲·過八年不在行用·至其年被廢·其數已兆矣·

犬異

金國天會十四年四月·中京小雨·大雷震·群犬數十·爭赴土河而死·所可救者才一二耳·

石氏女

京師民石氏·開茶肆·令幼女行茶·嘗有丐者病癯·垢污藍縷·直詣肆索飲·女敬而與之·不取錢·如是月餘·每旦擇佳茗以待·其父見之·怒不逐去·笞女·女略不介意·供伺益謹·又數日·丐者復來·謂女曰·汝能啜我殘茶否·女頗嫌不潔·少覆於地·即聞異香·亟飲之·便覺神清體健·丐者曰·我呂翁也·汝雖無緣·盡食吾茶·亦可隨汝所願·或富貴或壽皆可·女小家子不識貴·止求長壽·財物不乏·既去·具白父母·驚而尋之·已無見矣·女既笄·嫁一管營指揮使·後為吳燕王孫女乳母·受邑號·所乳女嫁高遵約·封康國太夫人·石氏壽百二十歲·

王天常

元豐中·京師有富人王天常·高魯王家婿也·一夕夢二急足追至一處·令閉目露坐·無得竊窺人物·吾檢會文字畢·當復來·既行·天常回顧·見門闕甚偉·榜曰三坤城·庭下桎梏者頗眾·皆僧道尼·亦有獄吏衛守·復坐移時·急足至·令同行·趨入公府·主者朝服坐·眾吏侍立·問何處來·答曰·京師·一吏稟曰·誤矣·所追王天常·非京師人·當速令此人歸·天常見他吏乃故友·死已年餘·齎抱一大冊·降階相揖道舊·曰·公可亟去·此非世人所處之地·問冊中何事·曰·記世間生死者·天常再三欲視己事·吏辭不獲·遂開一葉·但見某年月日以一刀死·急掩卷·令人送出·既寤·為親戚言之·恐罹非命·積憂成勞疾而終·後人思之·一刀蓋勞字也右二事趙伯璘言

黑風大王

汾陰后土祠·在汾水之南四十里·前臨洪河·連山為廟·蓋漢唐以來故址·宮闕壯麗·紹興間陷虜·女真統軍黑風大王者·領兵數萬·將窺梁益·館於祠下·腥羶污穢·盈積如阜·不加掃除·一夕乘醉欲入寢閣·觀後真容·且有媾瀆之意·左右固諫·弗聽·率十餘奴僕徑往·未及舉目·火光勃鬱·雜煙霧而興·冷逼於人·立不能定·統軍懼·急趨出·殿門自閉·有數輩在後·足為關闌翦斷·統軍百拜禱謝·乞以翼旦移屯·至期天宇清廓·杲日正中·片雲忽從祠上起·震電注雨·頃刻水深數尺·向之糞污·蕩滌無纖埃·統軍齋潔致祭·捐錢五萬緡以贖過·士卒死者什二三·

韓郡王薦士